

棠湖詩稿
三山鄭菊山先生清雋集
所南翁一百二十圖詩集
剪綃集

棠湖詩稿

岳珂著

編主五雲王

編初成集書叢

種三他其及稿詩湖棠

中華民國二十六年十二月初版

徐嚴

發行人

王雲五
長沙南正路

印刷所

商務印書館
長沙南正路

發行所

商務印書館
各埠

（本書校對者 徐壽齡 殷師竹）

棠湖詩稿

宋 相臺岳 珂肅之撰

宮詞一百首

宮詞自唐以來有之。如王建則世託近倖。花葉則身處宮闈。故其所述。皆耳聞目見。後之倣其體者。徒想像而言。未必近似。反流於褻亵者多矣。珂幼好其詞。嘗擬採其音律。以肆於毫簡。竊謂苟匪止乎禮義。有以寓諷諫。美形容。均爲無益。而困於公燭。有志未遂。比因棠湖綸釣之暇。適猶子規從軍自汴歸。誦言宮殿鐘簾。儼然猶在。慨想東都盛際。文物典章之偉。觀聖君賢臣之懿範。瞭然在目。輒用其體。成一百首。以示黍離宗周之未忘。其閒事核文詳。監今陳古。固有不得美刺而足以具文見意者。輶軒下采。或者轉而上徹。乙夜之觀。庶幾有補於萬一云。

五色雲煙覆帝城。御溝流水接金明。曉來珂繖沙堤鬧。萬歲聲中賀太平。

右一

一朵祥雲捧赭袍。九天春色醉仙桃。教坊度曲聲催酒。折檻雙瞻舞袖高。

右二

天街御膳寫臣封。隨例朝朝進六宮。後苑日高催泛索。茶牀擎出繡雲龍。

右三

五夜鐘聲上直時。焚香重熨早朝衣。裹頭殿直催排立。等候君王出木圍。

右四

雉扇雙分對聖顏。紫宸上闔正催班。退朝花底紛歸騎。春在金門萬柳間。

右五

內省催班立御廊。紫宸朝退侍君王。尙宮直筆呈章奏。一縷金猊繞殿香。

右六

黎明新火下龍墀。御柳青煙冷食時。別殿焚香催賜宴。傳宣教進謝恩詩。

右七

端辰帖子縷黃金。詞苑題來禁籞深。共道萬方欣解慍。南風已奏舜鳴琴。

右八

太液沉雲冷寢孤。宮簾卷月掛珊瑚。插天樓殿涼如洗。好是承平七夕圖。

右九

銀罌翠筦恰冬時。近臘金門賜口脂。無數槐籠擎積雪。日華漸上萬年枝。

右十

上黨王師未凱旋。鸞旗黃鉞正行邊。紅塵一騎傳天使。爲送宮中則劇錢。

右十一

六師夜撤廣陵圍。積甲蕪城一樣齊。淮海祗今清撤底。更留京觀築鯨鯢。

右十二

夜深雪壓內門前。一榻還驚四壁天。上相傳觴妻擁炭。歸來鼾息頓安眠。

右十三

闕門雙鳳鑄黃金。柳色宮溝轉綠陰。闕盡四門繩樣直。萬方同見一人心。

右十四

驥騄雙馳挽六鈞。一枝花葉委紅塵。相輝樓下空排馬。徒見寧王奉太真。

右十五

奎躔五緯驗連珠。瑞紀人文啓聖符。一札鐵衣天下誦。千山黑處起金烏。

右十六

駕前校臘起封狐。御箭親彎金僕姑。萬騎嵩呼開電笑。吾皇神武古今無。

右十七

麟麟車馬送降酋。紗帽重瞳伏御樓。三度金門聽露布。今晨又見下昇州。

右十八

雒壇燿火夜升煙。鹵簿如雲繡色鮮。萬姓歡呼還感泣。此生重遇太平年。

右十九

尙方絕製別精鏐。寶帶親傳鎮庫收。二十八條眞紫磨。人間那識紫雲樓。

右二十

并汾簞食望親征。儒館詩歌繼有聲。黃繖登臺城夜啓。參旗不展泰階平。

右二十一

侍宴羣儒立絳都。太清樓下望金輿。御前棗刻親摹寫。手賜新鐫古法書。

右二十二

燕臺膽落夏臺臣。萬國衣冠拱帝宸。更把文風兼教雨。一時淨洗舊邊塵。

右二十三

十里金明貫寶津。鴨頭新綠水粼粼。玉卮齊獻堯階壽。柳色花光一樣春。

右二十四

金門內使走天街。當殿親收宰相才。一榜盡除州別駕。謝恩未了杏園開。

右二十五

昇龍門內屋千楹。玉宇金題映紫庭。卷帙異書三十萬。至今光彩動奎星。

右二十六

龍鸞騫舞寫宸章。祕閣交輝白玉堂。格是帝中稱第一。不交合作羨鍾王。

右二十七

金根載耜赴齋宮。曉日東郊望六龍。肯爲三推便回輦。直須終畝勸耕農。

右二十八

乾元朵殿立黃麾。淳化新行入閣儀。鳴佩聲搖珠網近。夔龍先集鳳凰池。

右二十九

近僚三館集簪綬。後苑千花簇水涯。御網紅絲躍金鯉。龍輅更待釣璜師。

右三十

繡旗城上展黃龍。萬歲歡傳萬壘同。霹靂一聲妖彗殞。捷書清曙入行宮。

右三十一

五原塞上欸呼韓。春草新迷拜將壇。從此車書三萬里。邊臣日日奏平安。

右三十二

屬車望幸隘東方。珠玕金吾夾道旁。卻笑毗黎驚鹵簿。只知官是綠衣郎。

右三十三

紫金泥檢看東封。邊燧沉煙歲屢豐。一曲步虛傳御製。綠章初奏玉清宮。

右三十四

龍鱗鸞路祀汾睢。玉檢重開煥上儀。莫詫漢家躬武節。祗今千里亘旌旗。

右三十五

注輦衣冠聽九臚。周家王會看新圖。儀鸞扇篋瞻朝退。掃地金蓮撒殿珠。

右三十六

官簾匝地晝陰移。紅拂金壺殿腳隨。玉鳳墜釵心暗卜。聖情有喜近臣知。

右三十七

內家傳奏走金貂。不待君王退早朝。親見雲開天一笑。袖將犀果賜臣僚。

右三十八

外庭公事近今稀。琅鉏金跗試墨池。清景殿前春晝永。百篇書事寫新詩。

右三十九

東華銀榜麗卿雲。資善新開列近臣。昨夜清臺占上瑞。樂章已奏月重輪。

右四十

昭陽殿裏兩枝春。萼萼曾承雨露恩。自是百王無聖斷。犴車雙出內東門。

右四十一

天章閣下午陰移。十事封章奏玉墀。帝賚一夔兼一禹。爲時扶立太平基。

右四十二

清曉鳴鞭下禁除。迎陽紅日耀金鋪。輔臣賜坐宣儒館。同閱觀文鑒古圖。

右四十三

塞垣戰罷五單于。北驛吹塵捧國書。欲識天聲震夷貊。契丹新進九龍車。

右四十四

旄頭闌戟奉皮軒。禽獻三驅禮意存。未向長楊搏熊虎。先看萬騎獵楊村。

右四十五

玉階授鉞借前籌。上相提兵破貝州。騎火照山催召驛。紫宸殿上啓金甌。

右四十六

把麻宣讀趁朝參。百辟爭傳兩相銜。便覺太平元有象。肯教夢卜羨商巖。

右四十七

狄家天使夜行邊。穆卜親占百字錢。五嶺共看蕃落馬。便將時雨洗蠻煙。

右四十八

治定功成第四朝。八音純繹度英韶。儀鳳舞獸今千載。還見安安似帝堯。

右四十九

合宮復古肇精禋。心學重開聖制新。廣殿邃嚴金作榜。自將明德逆三神。

右五十

玉輦三朝奉至尊。並開朱邸傍金門。綠車日日朝慈壽。親見含飴慶弄孫。

右五十一

麟麟翟輅八變鳴。佐饒瑤池奉玉觥。一事百王元未有。聖人仍是聖人甥。

右五十二

後元富庶冠西京。萬國謳歌仰聖明。恭儉斷知元不改。太平天子法周成。

右五十三

氈廈鴻儒影侍纓。百年豐芑燕承平。上方親述先朝志。黃繖清晨下邇英。

右五十四

仙源瓜瓞慶縣縣。玉葉金枝億萬年。天意睦親流聖澤。已增宮院講書員。

右五十五

新渠瀾瀾漾波深。千里桑麻藹碧陰。喜動天顏古循吏。催教增秩賜黃金。

右五十六

聖心如鏡靜蟬蛸。欲仗元龜監已然。通志一編新進御。漢宮五夜翦金蓮。

右五十七

天都萬騎集生羌。大順城頭赤白囊。一鏃狂酋驚褫魄。夜來弧矢直天狼。

右五十八

治平嘉祐闡重光。煥幄龍鱗繡黼張。聖德共知天與子。觚壇燿火拜新陽。

右五十九

道山雲氣隔塵埃。制詔中書選茂才。藜照何須煩太乙。要觀數世育臺萊。

右六十

先傳陝右定天都。西域新來汗血駒。舊府折衝三十六。盡依銅虎鑄兵符。

右六十一

池上繁紅沁曙霞。喧天簫吹教坊家。龍舟近晚傳回輦。催進姚黃一朵花。

右六十二

露布銀臺聽捷鈴。把呈御藥屬頭廳。早朝見說天顏喜。新復河西十二城。

右六十三

丁丁宮漏滴金壺。璧筦龍媒薦玉蜍。燈火闌珊歌舞散。睿思殿裏答邊書。

右六十四

眞珠按轡蹙雙龍。西母頒來慶壽宮。聞道先朝開國日。降王曾服尙方工。

右六十五

曲臺稱制會羣儒。郊廟休疑聚訟殊。卻笑執經俟臨決。枉教白虎議西都。

右六十六

鴉山凌曉度先鋒。泣穴鼉鼉已滅蹤。天子聖明知萬里。歸徠州下拆泥封。

右六十七

萬里燕雲慮正深。赭袍衿甲被黃金。思文聖主師文母。猶待瑤池稟玉音。

右六十八

令僕初開政事廳。內前車馬沸昇平。翠華先幸尙書省。讀徧周官四摺屏。

右六十九

樂府仙韶奏九成。披香別殿瑞煙凝。紫雲不待傳新曲。春在瑤臺第一層。

右七十

宰相初除司馬家。正衙昨日聽宣麻。京都百萬人歡喜。爭築新堤十里沙。

右七十一

寶慈殿裏百花香。慈德宮前春晝長。紅繖龍輿尊聖瑞。三宮同捧萬年觴。

右七十二

繡裳畫袞地垂雲。風動槐龍舞玉宸。鈴索不搖鐘漏永。驪珠滿袖寵詞臣。

右七十三

鬼章夜縛下洮城。祝冊先朝永裕陵。二聖止戈元有指。未教狡穴盡秋鷹。

右七十四

貂冠駘背侍龍顏。前殿師臣第一班。坐使皇基增九鼎。得賢應許繼南山。

右七十五

洛京韞櫜起儒珍。進講忠規德日新。禁苑金絲舞垂柳。萬方已被發生仁。

右七十六

鳳儀魚躍更龍拏。傳寶猶矜趙璧瑕。一夜神光照東井。天教景命屬天家。

右七十七

宮樣新裝錦櫺鮮。都人爭服孟家蟬。天心誰識開真瑞。待見中興第十傳。

右七十八

今年下詔復河湟。峽路王師出省章。已報龍支新拓境。更開屬國處降羌。

右七十九

未央樓殿倚天開。東北偏高是月臺。馳道都人渾慣識。星毬爭指大家來。

右八十

壽星頻見大河清。宮殿金芝產九莖。樂府詞臣初應制。勅催院使按新聲。

右八十一

瑞雲擎出捧珠龍。十二時堂建合宮。□□頒常同正朔。要令聲教混華戎。

右八十二

午夜紅光照禁中。貢金鑄鼎効神工。羣臣稱瑞頻騰奏。及見祥雲鶴舞空。

右八十三

大晟新頒雅樂名。鈞天九奏雜英莖。君王元是身爲度。何待龍門聽水聲。

右八十四

翠麓連縣氣屬天。岵嶺艮嶽繞芝田。瑞禽可是曾迎駕。萬歲山頭識靜鞭。

右八十五

神霄九府絢雲霞。寶籙仙衣御絳紗。擲火流鈴傳帝蹕。藥珠殿裏降青華。

右八十六

□宮壁柱帶金缸。複道橫虹結綺窗。半道牙牌奏人辦。御舟纔過□□□。

右八十七

宣曲長楊御宿邊。期門屹立內門前。主人不解占星象。猶識紅條白玉拳。

右八十八

殿前舞罷聽傳宣。新學霓裳小絳仙。取賜合同教請寶。御書新樣鑄金錢。

右八十九

鰲山綵締聳仙峯。萬盞華燈寶籙宮。金字大書雙鳳闕。宣和衆樂與民同。

右九十

追成栗玉□□冠。網綴紅絲七寶欄。□□宮前看進輦。天旋地□□□歎。

右九十一

折檻朱雲諫未休。一封曾斬佞臣頭。猶憐不及先朝議。遺恨山河繞雍州。

右九十二

圍場望幸絕長楊。汴水塵高御柳黃。萬姓爭傳天子聖。新來有旨罷鷹坊。

右九十三

黃門紫詔下蒿萊。一札風雷衆正開。四海傾心比葵藿。黃金已報築燕臺。

右九十四

三更內省奏邊機。闔子門頭等御批。坐待報籌呼絳幘。上陽曉色已多時。

右九十五

詔旨今年法祖宗。御前無復舊斜封。震雷驚落姦邪膽。見說崇山放四凶。

右九十六

羣才錯落彙征初。猶是仁皇四世儲。履坦幽人已逢吉。更無學術自荆舒。

右九十七

金花詔紙夜封片。首錄先朝社稷臣。貫日精忠格天業。羌胡勿謂漢無人。

右九十八

金城十仞據陽池。三鎮高局死不隨。自是天恩浹肌髓。不關左袵限戎夷。

右九十九

鬱蔥佳氣藹南都。共識彊華赤伏符。地紀已占江渡馬。天心定見屋流烏。

右一百